

38-боб. Товарларни ва транспорт воситаларини чиқариб юбориш

271-модда. Товарларни ва транспорт воситаларини чиқариб юбориш асослари

Қуйидаги шартларга риоя этилиши товарларни ва транспорт воситаларини чиқариб юбориш учун асос бўлади:

божхона расмийлаштируви ва товарларни текшириш вақтида қонун ҳужжатлари бузилганлиги божхона органлари томонидан аниқланмаганда;

божхона органига Ўзбекистон Республикасининг қонун ҳужжатларига ва халқаро шартномаларига мувофиқ товарларни чиқариб юбориш учун зарур бўлган лицензиялар, сертификатлар, бошқа давлат органларининг рухсатномалари тақдим этилганда, бундан шундай ҳужжатларнинг товарлар ва транспорт воситалари чиқариб юборилганидан кейин тақдим этилиши ҳоллари мустасно;

товарларни ва транспорт воситаларини танланган божхона режимига жойлаштириш талаблари ва шартларига декларант ёки божхона брокери томонидан (агар божхона брокери божхона расмийлаштируви бўйича операцияларни шартнома асосида бажараётган бўлса) риоя этилганда;

товарларга ва транспорт воситаларига нисбатан божхона тўловлари тўланганда ёхуд уларнинг тўланишини таъминлаш тақдим этилганда.

272-модда. Товарларни божхона юк декларацияси топширилгунига қадар чиқариб юбориш

Ушбу Кодекснинг [251-моддасида](#) кўрсатилган товарлар божхона чегараси орқали олиб ўтилаётганда товарларни чиқариб юбориш божхона юк декларацияси топширилгунига қадар ёки божхона расмийлаштируви

бўйича операциялар якунлангунига қадар декларант ёки божхона брокери томонидан қуйидаги шартларга риоя этилган тақдирда амалга оширилиши мумкин:

товарларни идентификациялаш имконини берувчи зарур маълумотларни ўз ичига олган товарнинг кузатув ҳужжатлари тақдим этилганда;

Ўзбекистон Республикасининг қонун ҳужжатларига ёки халқаро шартномаларига мувофиқ радиоактив материалларни чиқариб юбориш учун зарур бўлган лицензиялар, сертификатлар, тегишли давлат органларининг рухсатномалари тақдим этилганда;

ушбу Кодекснинг [47-бобига](#) мувофиқ божхона тўловларини тўлаш таъминланганда;

товарлар чиқариб юборилган кундан эътиборан ўн беш календарь кундан кечиктирмай божхона юк декларациясини бериш ҳақида ёки божхона расмийлаштирувини тугатиш тўғрисида ёзма мажбурият тақдим этилганда.

Божхона юк декларацияси берилгунига қадар чиқариб юборилган тез бузиладиган товарлардан ҳамда тирик ҳайвонлардан фойдаланиш ва уларни учинчи шахсларга бериш, шу жумладан сотиш ёки бошқача тарзда ўзга шахсга ўтказиш орқали бериш тақиқланади.

273-модда. Божхона тўғрисидаги қонун ҳужжатлари бузилган тақдирда товарларни чиқариб юбориш

Божхона тўғрисидаги қонун ҳужжатларининг бузилиши аниқланган тақдирда товарларни чиқариб юбориш божхона тўғрисидаги қонун ҳужжатларининг бузилишига оид иш юритув тугаллангунига қадар амалга оширилиши мумкин, башарти:

товарлар қонун ҳужжатларига мувофиқ олиб қўйилмаган ёки хатланмаган бўлса;

қонун ҳужжатларига мувофиқ товарлар мусодара қилиниши ёхуд давлат даромадига ўтказилиши лозим бўлмаса;

божхона тўғрисидаги қонун ҳужжатларининг бузилишига оид ишни кўриб чиқиш натижалари бўйича ҳисобланиши мумкин бўлган божхона тўловларини ва жарималарни тўлаш ёки қонун ҳужжатларида назарда тутилган бошқа ундирув чоралари декларант томонидан таъминланган бўлса.